



EXECUTIVE SECRETARY IN LEILON PASTOR BIAL KIKHAWMPI MATPINA



PEACE CONSULTATION | SYNOD HALL, I.B. ROAD

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India

TUKHANG AH JAWLNEI LEH KOCHUAM

- Dawtheina
- Rehabilitation Centre
- Kum Zabi 21na Ah Chate Etkawl Dan
- KKP leh YVA Sepkhawmdan Pha



Editor : Rev. Kamkhotinthang Neihsial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Neikhovak, General Secretary, CKNP
: Tv. Lianmuanthang, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	02
3. Tukhang ah Jawlnei leh Kochuam	04
4. Dawtheina	08
5. Rehabilitation Centre	12
6. Kum Zabi 21na ah Chate Etkawl Dan	15
7. KKP leh YVA Sepkhawmdan Pha	20
8. Mihing Khawsakdan in Khua leh Van Umdan a Sukdanglamdan	24
9. Hukdam hi Kihetchianna	31
10. Lâ leh a Chanchin	36
11. KNP Huang	38
12. 2025 Pastoral Ministry Thupi	39

SYNOD PUIPATE

Moderator : Rev. Vanlalchhuanga
Secretaries : Rev. Andrew LR Khiangte (Sr.)
: Rev. Summinlian Vaiphei (Jr.)
Finance Officer : Upa Tinliankham
Statistician : Rev. Thianganlim Vaiphei
Executive Secretary : Rev. Kamkhotinthang Neihsial
Consultant : Rev. C. Lalremruata

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Tangphai Presbyterian Kochuamte'n Pathian dawigual ah ma i sawn zel theina dingun.
2. Kochuamte lak ah halthakna (Revival) a hung tunna ding in dawn hitiu.
3. Synod Committee chuam chuam ah Puitute â ding in Pauchap piak hitiu.
4. Kochuam tin ah Sunday School hotu, zilfîltu leh zillaite zosia â ding in.
5. Gamsung buaina ah panlatu pawl chuam chuam ah puitute â ding in pauchap hitiu.

Hinna Vâk Simtu Dawitakte leh ngainatute zosiate la bawn un Dawisakna Chibai ka hun bûk hi.

Tuchung **Hinna Vâk** ah hin chial bîkte ah kipat Article leh Sermon hawi tak tak sim thei ding in i um kit ua, kipak a um takzet hi. Simtute'n i lawkpi ngei uh ka kinem hi.

Rev. T. Zuanlal in tukhang ah Kochuamte i bitna ding uh chu thupuan leh kilâkna hilo in Jesu Khrista suangpi chung ah det tak ah um a hidan - 'Tu khang ah Jawlnei leh kochuam' ti thupi pawimaw tak ei zikpiak hi.

Rev. Siamlaron in Gingtute'n i nisîn hinkhuau ah bangtik hun ah le i mamawu leh i pawimaw zing uh thagau gate lak ah pakhat- 'Dawtheina' ngainawp um tak a hun zik hi.

Pu Kamzathang in zu leh sa leh khamthei ah kawltangte etkawl na kawng ah Kochuamte ki-awngsut mailo ah, kochuam in a hi ngei ngei di a hidan- 'Rehabilitation Centre' ti thupi mangcha'n a hun zik hi.

Insung ah nu leh pa zosia'n chate etkawl na kawng ah pan i lak zing lai un lawsapna leh lawtinna in a kihelto zing hi. Mi zosia'n i pawimawu chate etkawl didan ngainuam um tak mai in **Pi Betty** in- 'Kum zabi 21-na ah chate' ti thupi mang ah a zik sim di i hiu.

Pu Kambenjohn in kipak ni leh da ni ah i namatpen uh KKP leh YVA te pankhawm didan pawimaw tak mai 'KKP leh YVA Sepkhawmdan pha' ti a hun zik hi.

D. Lalthamuan Vaiphei in gammâng leh thilhingte i etkawl phatlo ziaak ua mihingte'n haksatna i tuakteu leh kochuamte'n panlak thak didan mumal tak in- 'Khua leh Van Kithenna ah Mihingte Mawpuakna' ti thupi in a hun zik hi.

Gingtu khenkhatte lak ah hukdam a hi leh a hilo kihechianlo a buai tam tak a um thei ah. Ziate lak ah kipat i buailona ding un **Tv. Henlallian** in a zik, 'Hukdam Kihatchianna' sim di i hiu.

Rev. Vanlalchhuanga, Moderator in kum 2025 Pastor thupi- 'Chamna Siamtu' ti a zik hi.

Zia thu chuam chuamte ah kipat Lalpa'n simtute zosia malzawl chiat ta hen!



Kochuam Huang

Leilon Pastor Bial vethakna

Bialtu Pastor Rev. Khuplemlal dam thiag nailo ziaak in Officer's Meeting 40:3(9) dt. 18.03.25 chun Leilon Pastor Bial chu a pawimaw dungzui ah Office lam in a etkaw! mai di lem a sak dungzui in Rev. Kamkhotinthang Neihzial, Executive Secretary in Leilon Pastor Bial vethakna, Ni 26 May, 2025 - Ni 6 June, 2025 sung va ch  m in, a nei thei hi. Zia hun sung ah hin Bial Kikhawmpi, Seminar leh Kochuam chuam chuam ah sel leh sang a guanggal thei hi.

Pentecost Programme

Kochuam Nib  k pawimaw Pentecost Ni chu Rev. Kamkhotinthang Neihzial, Executive Secretary in Sumtukphai Kochuam in sun hun Programme a va mangthei ah, zia hun ah chun Synod Choir inle zui in Pathian chawihawina Lapawl a va sa thei u'i. Nitak hun in Lanva TD Block Relief camp, Lingsiphai ah IDP te tawh kikhawp

khawmna hun a nei thei hi.

Rev. C. Lalremruata, Consultant in S. Munnuam Kochuam in Programme a va mangthei a, S. Munnuam Pastor Bial Lapawl in Pathian chawihawina Lapawl a sa thei u'i.

Peace Consultation

Peace & Justice Committee, Presbyterian Church of India General Assembly guanggalna Peace Consultation Programme, "The role of the Church in Peace Building" ti thupi mang in Ni 11 June, 2025 ni'n Synod Hall, IB Road ah lawting tak in matzaw a hi. Programme ah hin Tangphai Provisional Synod thasang in mi pakua (9) a pang thei u'i.

Vaiphei Veng Branch Church vethakna

Ni 15 June, 2025 (Pathianni) in Vaiphei Veng Branch Church, S. Munnuam Pastor Bial ah um chu Rev. Kamkhotinthang Neihzial, Executive Secretary in vethakna a nei ah, Kochuamte tawh kikhawp khawmna hun in Pathian thu genna a nei thei hi. Vethakna

HINNA VÂK

Programme ah hin Synod Choir inle zui in Pathian chawihawina Lapawl a sa thei u’i.

Finance Campaign di thu

Synod Finance Committee leh Synod Executive Committee lemsak dungzui in Finance Campaign Kochuam tin ah mat ding ah guanggalna siam a hi. Ni 1 August, 2025 (Simhaini) in Orientation Programme um intin, Ni 2 & 3 August, 2025 (Kiginni & Pathianni) in Campaign nei di hi’na. Programme kimzaw chu Kochuam tin in a la ngaiven hitiu.

Bial min then thu

Sugnu Pastor Bial a lah kiti sek chu Gamsung buai zia in Sugnu ah chên thei a hi ta pua, Sugnu Pastor Bial Standing Committee in Bial

min Dongjang Pastor Bial ti ah then ding ah dawtna a siam chu Synod Executive Committee 16:10 dt. 12 & 13.06.2025 chun lem a sak pi a, Sugnu Pastor Bial ti chu Dongjang Pastor Bial ti tâk zawk di a hi.

Bial Centre Dongjang mun in Ni 7 June, 2025 (Kiginni) ni’n Bialtu Pastor Rev. Summinlian Vaiphei a kichawnlut thei hi.

Tangphai Provisional Synod Office timing siamlem thu

Synod Executive Committee 16:12 dt. 12 & 13. 06. 2025 lemsak dungzui in Tangphai Provisional Synod Office kai hun sung ziagual ah hin siamthak a hi.

Summer:

April- Sept.: 9:30am- 4:00pm

Winter:

Oct- March: 9:30am- 3:30pm

“La phatnate leh chanvote chu kisanpi a, la chapopi lona ding in kiveng inla; Jesu Khrista leh a hâtna bep chu ngaitua zing inla, kisanpi zing zaw’n; Zia bep chu la kipuklona ding ah la kivên theina umsun a hi ngal a”

~ Charles Spurgeon

TU KHANG AH JAWLNEI LEH KOCHUAM

~ Rev. T. Zuanlal
New Lamka (G)

Juda zilsaktute chun Thuthung Thak hun ah hin Jawlnei hi tawpta ah ngaina a langsal ma ma hi. Ahi'n ziagual ngaidan chu a um zinglai in hun nunung lam ziktute chun Thuthung Lui ah mite min mang in hillawkna thu a la zik zel ui. Quran ah etsakna'n Danbu 18:15-18 thu tawh saisan in Jawlnei kua a h'em, Mosi a h'em a gingchau hi. Ahinla, Thuthung Thak ah kinepna chu Jesu Khrista ah sukbukim in a um ta a hi. (Luk 1: 5, 67)

Bible ah Jawlnei umzia

Thuthung Lui ah Hebrai paukam '**Nabi**' chu Jawlnei ah ledaw a hia, chuleh Hebrai ah Rōeh leh Hōzeh-te hi muthei (seen) tina gel gel a hi. Grik pau ah chun Jawlnei chu Prophet ti a hi. A umzia chu midangte ma-ang ah thugen tina a hi. Arabic thumal '**Naba**' ah kipat hung kilasawn hi ding in mithiamte chun a gingchau ah, a umzia chu "Thupuang" (to announce) tina a hi. Zia ziak chun, '**Nabi**' (Jawlnei) chu 'Thupuangtu' tina ngai a hi.

Chuleh, mithiam khenkhat chun '**Nabi**' chu '**Akkadian**' pau thumal '**Nabu**' pat laksawn hi ding in a gingchau hi, a umzia chu '**ko**' (call) tina a hi. Zia ziak chun Jawlnei chu Pathian in a ko leh ko a hinau kihechiente genna hi in a ngai uh a hi. Zia pau bulte ah kipat hin Jawlnei chu "Thupuangtu" a hi dan i he thei tau a hi.

Jawlnei nasep

Jawlneite Pathian kamsang midangte kiang ah thugen ding ah thupiak (Authorized Spoken) a hi tina a hi. Mi

HINNA VÂK

chuam chuam, dinmun kibanglo tak takte a la têlsek hi. Thugen lawklam hi Jawlnei nasep pipen a hi diak puai. Mipite lamdik ah puihuai di (Moral Life). Pathian thu gual ah hinna lampi dik ah pui di hi a thupi pawimawpen chu a hi ti i mu thei hi. Jawlneite hin a thupuan uh hi Pathian ah kipat a hidan uar tak in ‘Lalpa’n a gen hi’ tite, ‘Lalpa thusuak a hi’ tite a gen u’i. Jawlnei nasep chu Pathian sawlna sep leh sukpitin di chu a hi.

Thuthung Lui ah Jawlnei

Thuthung Lui hun ah Jawlnei hun hin a huap lian ma ma hi, Abraham (Thl 20: 7) a masapen hi, Aron (Pdt 7: 1), Miriam (Pdt 15:20), Mosi (Kis 12: 6-8) leh a dang tampi a um hi.

Judate Bible hin Jawlnei lekha a chuam chuam in a la gen a, Jawlnei masate (Jawlnei liante: Isai, Jeremiah, Ezekiel, Danial) leh Jawlnei nunung (a neu) 12 a um hi.

Thuthang Thak ah Jawlnei

Thuthung Thak ah Jawlnei nâ hi sutzawp in a um a hi.

A challeng deu chu Baptistu Johan himai ina (Luk 7: 24-26; 16:16; 20:6). Lal Jesu hi Ama Jawlnei kitilo maleh mite’n Jawlnei a hi a hiau a hi (Mat 21:11, 46; Mar 6:5; Joh 4: 19; 6:14; 7:40; Nas 3:22) khawvel ah Jawlnei hung hi in a ging uh a hi.

Kochuam masate lak ah Jawlnei a la um hi

Antiok (Khristian tina masapen) ah hin Jawlnei a um uh a hi (Nas 13:11, 27-28; 21:10; 13:1-2). Kochuamte lak ah, a sung ah hin Jawlnei a la um uh a hi (Nas 1:27-28; 1 Ko 13: 2; 14: 3-5,24; Eph 3:5; 1 Ti 1:8; 4:14; Tpn 22:6).

Ahileh Jawlnei na pen bang a hi em i tiu a hi chun, Apostol Paul chun hitin a gen a hi “Thugentu chun vang mihingte kiang in siamphatna thute, fuina thute leh thamuanna thute a gen hi” (1Ko 14:3). Mithiamte chun zia tak ah thugentu hi Grik pau lam ah chun Jawlnei paukam ma mat a hi a tiu. Jawlnei chu mite â ding in a lûl in a pawimaw ma ma hi. Thagau kilatna thu mitin

kiang ah piak ahi'n, zia chu mi zosia phatchuamna di a hi ti in Apostol Paul in a gen a hi (1 Ko 12: 7)

Tukhang (Tulai ah hin Jawlnei a um em?)

Jawlnei nâ hi Thiampute leh Lengte gual ah kigolua sawnna a hi puai ti i Bible ah kipat i mu uh a hi. Kochuam masate (Antioch) dinmun ah pat i thîl chun Jawlnei na hi Kochuam cheina a sawng a sawng ah um diat diat (Hierchical Office) in Kochuam sung ah umta hi in a ngai ua. Jawlnei chuam bik umtalo in ngai a hi. Kochuam huangsung leh Kochuam haw malam in i sêm tau a hi ti in a gen thei hi. Chuti a hi zinglai in pawlpi kikawi chuamna pawlam in a hung kilang tho sek hi. Pathian dawigual leh thupiak gual ah mite a umtheina ding ua sep chu Jawlnei na'n a tup pipen chu a hi. Zia nâ hi kiltin ah kipat sep thei a hi.

Ahi'n, mitin phatchuam chiatna di hilo, mimal kua tawhbang a h'em khat lawkna di leh dawidan sukpitinna

ding in Jawlnei hi thupuan genmawi ah tangkopi le a um tho hi. Ahinla, mi kuale Pathian âw leh a puihuaina henuamte â ding in A thu (Bible) leh Thagau Thiangtho in ei chenkhumna zia in he thei i hiu.

Nikhat chu Butak leh Bulêm khendanna um ding a hi. Tuhin a hi leh Bible in a gen gual in a tak leh a lêm khendan a haksâ a hi. Zia zia chun tukhang kilakna thupuan thu ah hin Kochuamte i lunggil kaihuaina di, chittheina di neukhat gen hitiu:

1. Tulai ah mi khenkhat ah kipat Pathian thupuan leh kilâkna kigente hi a dik hi, a dik puai i ti ziang thei puai, amabochu Pathian thu tena diklo theilo, Chanchinpha vâk ah kipat thîl hitiu in Jesu Khrista tawh kilem a hi chun dâllo di a hi. Maleh, i kochuam thugin tawh kimillo a hi chun zia kipat chu pilvan ngai ma ma di a hi. Chanchinpha tawh kimillo Jawlnei/Thagau thupuan gingtute hinkhua

HINNA VÂK

tawh a kimil tak tak thei pua, kikawi kiang di a hi.

2. Mimal khawvel a hithei leh mi huai theina neite, Kochuam sung ah um nuamlo, amau dawidan leh phasakdan ah mi kaihuai, a neinunna ah nasem, Bible thugen tawh kituaklo a hung pawt sau sau ta a hi. Peter in Jawlnei lêm a ti gual ah Pathian thu sumkawlveina mangtu Jawlnei hung piang di a ti kha umta di a hi. Ei uh hun vang Jawlnei lêm ti ngam khel puai tiu. Kochuamte hin hun nunung ah um i hi ti kihia'n Jawlnei thupuan leh kilâkna haw sang ah phachuam zaw Pathian Aw (Bible) hi ngun tak in sût in zia chun ding det hitiu.

3. Jawlnei in a sep di, a tup di pawimaw tak chu mite siamphat, fui leh thamuan a hi. Zia chu mitin phatchuamna di a hi (Eph 4:11-13). Zia zia chun tulai ah Jawlnei thupuangtute leh kilaknate hin mihing

hinkhua a sukbuai thei hi lamdiklo ei zuisak thei a hi. Minsiatna di thupuan chu Jawlnei tuppen a hi puai. Jawlnei paukam ah Kochuam sung politics lam leh a dang a thupuan leh kilâkna thu gen haw hi a guitunlo leh mualphona khat a hi. Jawlnei paukam thugen lawk lam sang in Pathian thutak gen ha bawl hitiu.

Thukhakna

Masanglai a khan Pathian in lampi chuam chuam in i pu leh pateu kiang in Jawlnei mang in thu a la gen sek ah. Tu hun nunung lam ah hin vang a Chapa in i kiang un thu a gen zaw a hi (Heb. 1:1-29).

Kochuam in tukhang ah i bitna ding uh chu thupuan leh kilâkna hilo in Jesu Khrista suangpi chung ah det tak ah um ah, Kochuam thugin leh kikaihuaaina tûkdet chu i kipumkhatnau leh i bitna pen uh a hi. Lalpa'n simtu zosia â ding in malzawl ta hen.

DAWTHEINA

~ Rev. Siamlalron
i/c Sumtukphai Pastor Bial

1. Thumapui: Dawtheina a um chun **dawtheilona** le a um hi ti hiat masak a ngai hi. Dawtheina hi mihingte umchan, khan chan ding ah pawimaw ma ma khat a hi. Bible ah chun dawtheina hi **Thagau Ga** (Gal 5:22) te lak ah khat ahia, mimal leh khawtâng hinkhawmna ding ah hindan pawimaw ma ma a hi. Dawtheina hi mi zosia â ding ah pawimaw, *i zui diklo chun thagau lam leh taksa lam tiang ah buaina nasatak tun thei khat a hi zia in, dawtheina hi zil ah, hechian ah, zui ah, hinpi thei ding ah zildawk ding in simtu zosia i kidawisak uh a hi.*

2. Dawtheilona chu bang a h'em? Dawtheilona chun taksa nasepte a sêm dawk sek hi, ziate chu-*angkawmna, tatsualna, buakna, hûkna, huatna, kinakna, lungnatna, kilanna, umchuamna, gindanchuamna, ênna, tualthana, kinawptelna* (Gal 5:19-20) te a hiu. Ziagual taksa nasepte hin mimal, sungkuan, Kochuam, khawtâng leh nam leh gam tiang â ding in siatna leh buaina tamtak a tun thei hi. Zia zia in chun,

dawtheilona phatlo dan ah kipat in dawtheina pawimaw zia zildawk leu hin kipakum ma ma di a hi.

3. Dawtheina chu bang a hi em? A masa lam ah i gensa gual un Dawtheina hi **Thagau Gâ** (Gal 5:22) te lak ah khat a hi. Zia umzia chu gingtu diktakte hindan leh chawn leh khandan ding ah pha leh pawimaw tina a hi. Dawtheina hi ngakzawna a h'em, kisumzawna a h'em genna bep hilo in-khawheidan chuam deu

(*Khristian hindan tawh kituak*) mang ah ngak ham hamna leh Pathian phatna leh a huntiam ngakzawnate hi dawtheina chu a hi. Bible in dawthei a ngai hun tamtak a gen ah- nisin hinkhua ah kipak hun leh da ni khua ah ngak ham hamte, nawpsak hun leh nawpsaklo hun ah ngak ham hamte, lawi leh pai leh midang tawh kikal ah ngak ham hamte, a diak ah Pathian thutiam ah ginum tak leh thuakzo tak ah ngak ham hamte a huap vek hi.

4. Dawtheina nasepte:

Dawtheina hin mimal leh pawl ah thil chuam chuam a semdawk thei hi. Ziate lak ah pawimaw diakte chu-

1) *Dawtheina'n thupukna dik ei siampiak hi:*
Dawtheilona hi thagaumilote umchan, mi lungthim neu leh lungchawmte hindan ahia, ziagual mite chun thupukna pha leh dik a siam thei sek puau ah, khawnung ah buaina

leh haksatna a tun thei sek hi. Ahinla, dawthei tak ah hinkhua mang ah mi kisûmtheite chun thupukna dik a ngak dawk zo sek ua, mimal leh a pawl ah hinkhawmna lam inle a lamzang ah, mipite â ding inle thupukna dik a siam dawk thei sek hi.

2) *Dawtheina chun lungthim damtheina ei pia'i:* Lungthim damtheina ding in lungthim putdan kitûp nei a ngai ah, lungthim putdan kitup chu dawtheina neite'n a nei sek uh a hi. Thupil in lungthim kipakna chu damdawi phatak a hi'n lungthim thasia chun vang gu leh châng a hikeu hi (Tpl 17:22) a tia. Lungthim kipakna ding ah chun kisûmthei tak ah a pha lam, a vâk lam, a hawi lam zosia thîl zing a ngai hi. Banggual siatna leh haksatna maitua sek maleu a phalam thîl thiamte chun puakdan

a thiam tei tei sek u'i. A phalo lam leh a sia lam thîlna hin lungthim a damthei pua, natna lian zaw a siam khawlaw thei sek hi. Zia ziak chun dawtheina tawh kipaktheina hin lungthim damtheina ei pia a hi.

3) *Dawtheina chun kisumtheina ei pia a hi:* Mimal, sungkuan leh khawtâng ah siatna tamzaw hi kisumtheilona leh dawtheilona ziak a hi kiti leh kigenkhiallo maithei a hi. Mi dawtheina neite chu a kisumthei tangpi ua, mi kisumtheite chun Pathian leh mihingte dawisakna leh malsawmna a chang sek u'i. Thupil in, "Mi lungdia thei chu thagum hat sang in a phazaw hen; a lungnatna kisumzo mi chu, khawpi lazo mi sang in a phazawi (Tpl 16:32) a ti. Kisumtheina chu thagau ga a hia, ziagual neite chu Pathian chate a hui

ah, gualzawna leh hatna a chang sek u'i.

4) *Dawtheina chun kipumkhatna ei siampiakh:* Dawthei tak ah hinkhua mat hi mimal hinkhua leh midangte tawh chengkhawmna â di tiang in a pawimaw takzet hi. Unau kihothei dial dial ah chên khawm hi a nuam in a phanalawm lawm e (Sam 133:1) ti in Sam ziktu'n a lah zik hi. Kihothei tak ah chênkhawm thei hi kipumkhatna bulpi ahia, gingtute um didan him le a hi. Sungkuan, Kochuam, khawtâng leh Chi leh Nam kipumkhatna ding in mimal tinte'n dawtheina nei a ngai hi. Mani tup guallo deu ah vaihawmna leh thupûkna a um hun ah le dawthei tak ah zui ham ham, eima dawidan lo ah thukhenna a um hun ah le lungpi khual tak ah zui thiamte chu kipumkhatna siamtu a hi. Pathian nei diktakte

HINNA VÂK

chu dawthei tak leh
kithunun zo tak in a
um sek ua, zia chun
kipumkhatna ga a sua
sek hi.

5) *Dawtheina chun
kumtuang tiang dai di
thupukna ei siampiak
thei hi:* Dawtheina hi
thagau ga a hi ti a masa
lam in i lah gen tau ah,
thagau ga chu thagau
mite leh Pathian chate'n
a nei uh a hi. Pathian
chate i hui chun golua
di, Khrista tawh golua
khawm di (Rom 8:17) i
hitau hi ti kichian tak in
Romte lekhathawt in i
mu' a hi. Zia zia chun,
dawthei tak ah hinkhua
matna hin kumtuang
tiang dai ding thupûkna
ei siampiak thei a hi
zia in dawthei tak ah
hinkhua mat hi gingtute
hin didan leh khawsak
didan him a hi.

5. **Khaikhawmna:** Dawtheina
kiti hi thu bailam tak hi
leh kilawm maleh zui
haksatak leh pawimaw ma
ma thagau ga pakhat a hi.
Pathian thu chun, "*Kuale
thilpha hi ah, dawtheitak
ah umte chun, lopina leh
chawisannate, thitheilona
leh kumtuang hinna chu
chang in au* (Rom 2:7)
ti'n Romte zik in a kimu.
Dawtheina pawimaw dan
leh a nei thei didan tamlo
cha i taklat teu hi ngaitua
zing kawm in, dawthei tak
ah hinkhua mangte chun
***lopinate, chawisannate,
thitheilonate leh
kumtuang hinna*** chang
di a hui ti Pathian thu in
ei genpiak hi muang in,
dawtheina lungthim leh
hinkhua nei thei chiat ding
ah pan la thak zel ding in
simtu zosia i kichial uh a hi.

*Pathian chun kraws ah khan a hepina a hung sulang ta a hi.
Kraws lêk ah Jesu khaikân a hi ah, a thisan hung luangtha chu
Pathian in khawvel kiang ah "Ka hung hepi hi" a tina a hi.*

~ Billy Graham

REHABILITATION CENTRE

~ Pu Kamzathang
Revival Speaker

***Thi ding ah umte chu la hukdaw a, tha ding ah pui mang ah umte chu la hukdaw chun; “Zia hi ka la he’kha dang e!” la ti chun, thinlung bûkpa chun helo ding a hem? La hinna voppa chun zia chu helo ding a hem? Mi tin a thilbawl tawh kigûn in thuk lo ding a hem?
(Thupilte 24: 11-12)***

Gamsung khawtâng leh Kochuam sung subuaitu leh subuaktute lak ah i muda penteu leh i kidak pen uh, i ngaisaklo pen uh chu khamthei bawlte haw hi a hiu. Mi hetpilo leh panpilo ah buapi nasapen leh thuak nasapen chu a insung mite a hiu ah Lunggimna, zachatna, mualphona, sum leh pai tamtak insung van tiang ah chaite, beidawng ma ma insung tamtak kium ta a hi. A mau haw hi chen khawmpi khalo leh enkawl khalote hetkhêl leh ginchak khêl daih a khawsak khawmpi leh chen khawmpi haksa a hiu a, mani insung ngei ngei ah le gukdaw di ngaitua ah a

lem lem chawidawk ah zawk chîng, van pha tak tak a du uh damdawi a bawltheina ding ua man tawm cha cha a zawk teu, vangpha kisa tak ah a la chawkpiak nuam mi i lak ah le a la kium zel nalai, bang hun ah le ven zing ziang ngaite a hiu.

Ziagual mite haw hi a tângpi in lepchia gen leh thil gukdan hi a thiam deu tei ua, lepchia College ah graduate hileu kilawm khawp ah lepchia genthiam a hi tângpi u’i. A ziak chu, a nek hawl nau a hi ziak ahia, taksan thei tak tak a hi puau a, a gensau le lepchia, a gen laitak uh le lepchia, a gen kit ding uh le lepchia kiti leh le kigen val

HINNA VÂK

talua puana. A tângpi in zia gual mite haw hi amau utna leh dawitelna ngei ah zia lampi hi zui a hui ah maleh, zia lampi zui khatate hawhi amau UTNA leh dawitelna lam ah zui ah kilekit ding in khamthei thahatna zo ding ah hatna neizo talo a hi zia un panpi ngai a hui. Khamthei bawl mi a tamzawte hi kisiampat utna neite a hui a, phat la nawn leh kisiampat ziang tang ti ah kisiampat ziang hi mi tamlo a hui, zia gual mite haw hin dinmun pangai ah a umkit theina ding ua panla di leh amau panpi di diktak chu Pathian Kochuamte hi i hui.

Kochuam Upa pakhat in khamthei bawlte haw la enkawl nalai em ti'n ei dawng ah, *"ka enkawl nalai hi"*, ka ti leh, *"La pei mai mai le kasai, keila zia gual mi haw hi ka mu leh le kibeng kibeng ziang leh ka ut sek hi"* ei ti khum ah a muda him him zia ah a gen vang hisam puana. Lungsiat tâklo ei lungsiat ah, ngaidam tâklo ei ngaidam ah, sual setan in i taksa leh i thagau kumtuang ah mangthai ding ah manthaina lampi eila puitâkte, setan khut ah kipat

in ei hukdawh ah van khawpi ah chenkawmpi ding in a chapa hinna hial le it zolo in ei pia'i. Migilo mangthai mai di hukdawh ding in Khrista chun a kûl leh pawimaw zosia chu Kalvari tâng thing Kraws chung in a sêm zota. Khawvel zotu zawna Chanchinpha chu khawvel mite kiang ah puang ah, zia nâ chu sem sunzawm ding in Kochuamte hi thu ei pia a hi.

I nawn leh nawnplo thu ei dawng pua, i thatnawnpla leh i lunglutna lam a hi leh hilo le ei dawng puai. Thagau mangthai leh saltang hukdawh leh Chanchinpha hil chu Kochuamte kiang ah Lal Jesu thupiak a hi. Lal Jesu thupiak ngaipawimaw Kochuam chun zia hi ka tuina leh ka thatnawn zawng a hi ti'n nâ a tel ngai puau. Lal Jesu thupiak zawm ah Lal Jesu ngai pawimaw Kochuam i hinam ti ki-et le ngaisek a hi.

Khamthei thil bawlte haw hi kua etkawl di a hi ta diam? Ziate haw hi ka hekha puai, Kochuamte sep chi a hi puai, ziate sang ah pawimaw a tam hi, a hilo leh awl in kingaitua na'na tizel chi a hi diam?

Thi ding ah umte chu hukdawk inla, tha ding ah puimang ah umte chu hukdawk kin in, ngaitia, zia hi ka hekha puai la ti mai chun thinlung bûkpa chun helo ding a h'em? Sawlchak Paul in, *"Bawl makmaw ka chung in a kinga tangal ah"* a tigual in (1 Ko 9:16), i gamsung in khamthei bawl nasa tak in a pung/ piang zing ah. Rehabilitation Centre tam tak um maleh Thagaulam ah a lunghim ua chi diktak tu thei di khawp ah sêmtupha nei um tak tak lo a hi.

I Kochuam sung ah hinle Khanglai tamtak leh insung nu leh pate tiangle khamthei in a sukbuai kipunbe zêl a hi tak zia in khamthei bawlte etkawlina leh Chanchinpha puan thagaulam ah kisiamthak kitna hi bawl makmaw i chung ua kinga a hi. Mizoram Kochuam a chausiat tak tak theilo nau khu, thagau mangthai leh thagau saltang a ngai pawimaw zia uh a hi. Mizoram Presbyterian Kochuam in khamthei bawlte etkawlina mai mai le mun bangzat a hem nei

a hiu- Synod Rescue Home, Durtlang leh Champhai in a um a, Synod Social Front malâkna in khamthei bawl leh zuakte a kûl dungzui ah kiholimpi di Counsellor a nei bawk ua Kochuam mal ah khamthei bawlte etkawlina neile a um bawk u'i. Kochuam dang Salvation Army leh Baptist Kochuam te'n le nasa tak in khamthei bawlte etkawlina a chiapiu a hi. Synod Camping Centre ah Synod Revival Team-te mang in thasin camping matzing a hi bawk hi. Khamthei bawl centre ah umlote â ding bîk inle Gospel camping mat zing a hi. Lalpa kipakna pen chu migilo lungheina leh thagau mangthai hukdam a hi. Lalpa kipakna nasêm Kochuam chu Lalpa'n a thagau ah pawl in a lim sek uh a hi.

La thagau lam a keu em? Thagaulam in la hatlo em? Thagau lam in la lim thei paw em? Thagau mangthai Khrista kiang in pui inla zia phat chuleh, lim in, hat in, kipak inla tin Pathian Thagau Thiangtho pawl thakna chang ta'nla.

KUM ZABI 21 NA AH CHATE ETKAWL DAN

~ Pi Betty
Hill-Town

C hate etkaw l didan hi lampi khat um henla, zia chuh a milip in
Czui mai thei hileh a vak thadam um na maizen ding e aw... ka
ti vung vung sek chulam! Mihing hi lamdang tak leh mak tak ah
ei Siampa' n ei siam a hi zia k in, i mihinzia a kibang pua; felna,
thiamna leh lungput chuam chiat nei thei ding in ei siam nalai hi.
Mêl leh puam kibanglo, lunglutna le kibanglo, lunggel le kibanglo
chiat in ei siam ah, zia zia k ma chun lampi khat leh chiapi khat in
chate hile etkaw l thei a hi puau. I chate chiat chiat le nu khat, pa
khat hin hinapi'n, a mizia uh a kibanglo a hi. Hindan kibanglo tak
tak a hi zia k un, chate etkaw l didan zik hi a haksatna lianpi a um
a, a hawipen di le vak hiat ziang hi thil haksapi a hi.

Bible ah kipat in chate etkaw l
didan tampi i la mu, ziate lak
ah khat chu Thupilte 22:6 na
***“Naupangte chu lam dik hil
lechin, a hung upat tiang unle
pêtmang ta pua’n au”*** a la ti hi
a dik ma ma ziang hi. Naupang
etkaw lna ah hin kibunphuna
(*foundation*) pha a pawimaw
hi. Psychologist-te gendan
vang in, naupang kum 10 atin
masang un hawi tak in kaibât
in, khantona chuam chuam

(*Physical, emotional, social,
mental, spiritual etc.*) in enkawl
hile hin, a piting hinkhua ding
uh buaipi ngai talo di khawp
in a gen u’i. Sigmund Freud
in a la ngaipawimaw khat chu
naupang a let phat leh a mizia
di chu a neulai ah i etkaw ldan
in a kinga; chuleh a nungchang
khanonau (*personality
development*) uh hi nu leh pa
leh a enkawl tute (*caregivers*)
pankhawmna’n a kinga lian

mama in a gen hi.

Khang a hung kisang zel a, chate lungthim put leh nu leh pate lunggel le a hung kikâk hiai hiai hi in a kilang ta. Nu le pate â ding ah chun a del ah del thaw mai ngaita hileh a kilawm ziangta a hi. Tulai khang ah chate etkawl hi thatnawp um a hi zing lai in, huphul um (*challenging*) ma ma a hina tiang le a um hi. Internet mobile age, technology ah pianthakna hung sâng, khawtang chiapidan kisang danglam zing, lunggel khantona (*mental development*), environment issues la tam deu deuta. Zia haw zosia lak ah hung khang lian di naupangte enkawl ding in nu leh pate bangti'n i kisingsa ta diam uh leh? A neu a lian in la mobile phone chawita, nu leh pate sang ah social media matdan a he zawtau, umchan leh hinchin (*discipline*) lam la i khawtang uh i et leh kiak niam lam kimanaw deu deu hileh kilawm nalai.

Kum zabi 21na hun sung ah nu leh pate i hinau ah hin pan i lak thak uh a pawimaw takzetta

a hi. Technology pawmdan i thiam ua, a gamgi khien piakdan thiam ding ah i pilvan zawk sem uh a ngaitai. Ei uh nang zaw di gual le hung hilo di a hi. Phal leh phallo, ut leh utlo in thu pawtalo in, mobile phone tawh chengkhawm zing dite i hitau a, naupangte hinkhua â ding ah pawimaw leh a lo theilo le a hung hitai. Chate ettawn masak pente i hi zia un nu leh pate'n i phone matdan uh en thak chiat hitiu. Umdan tawidan bangkim nu leh pate ah kipat hung kizil pan sek ahi ngal ua. Phone mat phallo/ et theilo hun siam piak di a hi. Etsaknan: An nekna dawkan ahte, Biak In sung ahte, lekha sim hun ahte leh a dang dang ahte'n.

Zilti/ zilgai thaw inla, khap thaw kin. Khap thaw him him hin thil pha a pawdawklo a hi.

Chate'n mobile phone a matdan uh hi hawitak ah ensui (*monitoring*) in, et ding ah phalo, gingu hinkhua tawh kituaklote hetthiam sak thei leu hin a se lam sang in a phalam ah mat phatchuamna di tamzaw ma ma di a hi.

HINNA VÂK

Ziagual ah chate phone matdan etsui theina ding ah chun nu leh pate mani phone matdan kithunun (*discipline*) masak a kûl in a pawimaw a hi.

I kîm i kiang ahte lungput hethiam thei ding ah khawhetna (*emotional intelligence*) ngaikhawk a pawimaw hi. Social media hatna khawvel ah naupang in lim leh videos chuam chuam a mu zingteu hin lungthim sunathei, kingaisiat theina tamtak a um thei sek hi. I chateu un zia gual lunggel leh ngaituana a hung nei khak uh a hi chun hetthiamna tawh kaibât zing kawm ah zilgai a pawimawu hi. A lunggel uh piting nailo a hi zia in a kipaknau leh dânateu etkawldan (*control*) a thiam nai puau a, a masang hinkhua ding uh a khual thiam nailo uh a hi. Zia hun pawimaw tak ah hin hepina, hetthiamna leh dawtheina a pawimaw ma mau hi. Lungna leh ningtel tak ah zilgai khak ahiu chun thasuak theng khak hi thil bailam tak hung hi di a hi.

Kum bangzat chiatasa a h'em nungthîl in, nang neulai hun ziang tawh le vak tekhin le chin, tulai naupangte hin "KEI" ti hi a chiapi nasa ma ma mai tau a, mani kikawi pawimaw pen in, amau bep a kingaitua (*self-centered*) tau a hi. Midang ngaikhawkna keniam in, mani thawkna bep muthei, ama thawkna bep thawkna leh gimum ah ngai, chulah a langkhat lam ah, kipitinsak tak ah mi buaipei utna lungthim nei hileu kilawm. Kikawi chuam bîkna leh mani hun leh mun (*privacy*) dawina a lian a, "Ka chung, keima thuneina" (*It's my life*) tileh "Ka hinkhua, ka thu" (*My life, my rules*) tite lungput ah nei in zalen tak ah a chiapiu hi in a kilang pen tai.

A thuak uh hin thu leh La chuam chuam (*information*) a dawng khawm tam talaw tau a, luhai ah a thuak un na sem mumal talo a hi diam uh ti thei khawp in a um u'i. A miziau hetthiam a haksu, a lungput uh sim a haksu, nuam leh bailam tak ah a lungput uh thunun (*influence*) thei a hi zinglai un, nu leh pate'n etkaina nasep (*monitoring*) hawitak, Pathian

puihuaina dawn zing kawm in, pan lak takzet a pawimaw ta a hi. Lungthim hiselna (*mental health*) lam le ngai pawimawlo theilo a hi kit hi. Kidemna/ kitaitetna (*competition*) a sang ta, a hatpen/ titpen bep suachatna gam a hitai ti ngaidan (*survival of the fittest*) a tam tak zia in, a kingaisiat ding uh le vên zing a ngai ua, sukthathaw (*motivate*) leh tawsawt zing le a ngaicha sek uh a hi. Zia zia ah chun nu le pate'n, a ga mai hilo ah, a kisingsaknau a pawimawdan kibang a hidan hetthiam a pawimaw hi. Nu le pate hin i chateu panlaknateu hawhi pakchat a pawimaw hi. A result uh lungtung zolo a hi tâk inle, a panlaknau kipakpi thiam leu hin, amau â ding ah tilkhona leh tawsawtna thupi tak hizaw ngei ding in gingchak a um hi.

I chateu hi mani kitodel a hung hi theina ding un, lekha thiam leh nasepna nei bep hi a pawimaw a hi ziang pua, a hun a hun ah thutanna vak siam theina, a hun leh a mun dungzui ah a lungput hei danglam theina (*adaptability*) tite hile a pawimaw a hi.

Insak, inthang leh khawtang ah midangte tawh khawsak khawmdan thiam, chingthei tak ah mi lungthim suknatlona di paukam matte, umchan kilawm (*etiquette*) haw hile i chateu i zilsak uh a ngai hi. Officer thupi tak, umchan kilawm helo, khankhua helo i tite hi ngaisan um diaklo a hiu. Chate'n ziate haw hile insung ah pat a zil masak uh a pawimaw hi. Lunggel dik leh zang put haw hile langsar tak ah pawimaw in kilang beklo maleh, zia haw cha cha hi a hi insung nuam siamtu, kihepituana etsaktu, khawtang siamphatna ding ah matchak pawimaw chu!

Ziate hi i chateu hinkhua ah i chi tu theina ding un, nu le pate'n i bul pat uh a ngai hi. Cha hawi i dawu ua, cha lawting i dawu chiat ua, zia ding ah chun za lak ah sawmnga nang leh kei panlakdan ah kinga a hi. I kidawt chiat ding ua pawimaw chu "Lawtinna" i tiu hi bang a hi em? Nasepna hawitak mu a hi em, degree sang tak tak a nei uh a hi zaw diam? Ahiloleh, nu le pa za dan he, pi le pu lungsiat thiam

HINNA VÂK

a, Pathian thu ngaina, chi le nam zachakpilo ah khawtang â ding ah nasep thanuam? A bawn in a pawimaw suak hi! Zia zia ah chun, lekha thiamzilna (*academics*) bep ah lungthim i piak a, amau mizia leh nungchang khantona (*personality development*) lam i nunmulo a hi chun, a lawsam hi tho tho di i hui.

Zik leh gen ding a tam a, ngaidan leh gen ut le a tam hi. Ahinla, a pawimaw pen chu Pathian lau dan zilsak a, thiamzilna (*academics*) leh nungchang pha (*personality*) hi a kikim hel hel ah zil sak tei tei ding a hi.

Simtute zosia Pathian in nu leh pa lawting hithei ding in ei malzawl chiat ta hen!

KHAWVEL SUM LEH SUANGMANTAMTE

Naupang La gual ah i het mai uh, “Khawvel sum leh suangmantamte, ka dawn puai nawpsakna tawh, lungthim hawi leh thiangthona chu ka dawn zawi ziate sang chun” ti La kha pitingte â ding inle a pawimaw khawp mai hi.

Zia La phuaktu hin zia khawvel sum leh pai leh hausakna zosia chun kumtuang a dailo didan a hechian ah, ziate haw zosia sang ah chun kumtuang tiang ah a nei thei di lungthim hawi leh thiangtho a dawn zaw a hi. Ei-uh gingtute’n le diklo tak ah sum leh pai muna ding ah kitaisiaknate haisan in, lungthim thiangtho leh hawi neitheina ding in dawn zing leu hin Kochuam leh sungkuan ah kihepina tusang hin lian zaw ma ma di a hi.

Nikhat chu Sunday School zilsaktu khat in a naupangte kiang

in “Mi hausapa a h’em, Lazar a h’em la ut zawk uh? ti’n a dawng a, naupangte chu a ki-en vel vel ua, naupang khat a hung dingdawk ah, “Ka damlai in mi hausapa hi ka nuam a, ka thi phat leh chu Lazar hi ka hi nuam hi” a hung ti mai ah, zia naupang dawhuna hi i ngaitua chun tulai khawvel ah gingtute dawnhuna hileh a kilawm hi. I damlai hun sung in kihausa henla, In leh lo leh khawvel sum leh suangmante zosia nei in damsung hun a nuam thei pen in kimang leh i ti maithei, Pathian dawilo gual khawksalo in, i dawidan a hi chun mani leh mani thiam i kichan ua, himaleh, i thi phat uh leh Lazar hi i ut kit zêl tho u’i. Zia khawvel lopina leh hawinate del in i tâi ua, himaleh, manthaina lampi haw i hi kha sek u’i. Lungthim thiangtho i neilo chun dawitêlna dik mang theilo di i hui.

KKP LEH YVA SEPKHAWMDAN PHA

~ *Pu Kambenjohn*
Buallian

Gam leh nam hi henla Kochuam hitaleh a neitu chu Pathian a hi. Gam leh nam nei ah ei siamtu leh Kochuam ah ei dintu le Pathian ma a hi. Malai Israel-te chanchin Bible apat in vak thîl leu hin. Leng leh Lal lopi tak tak David, Solomon-te hun ah chun Leng leh Lal, Gam leh nam vaihawmtute kha Sakhua lam ah Thiampu hina dinmun tulo maleu ho leh biak lam ah chun mipi puihuaitu pen in a pang ua, gamsung bit leh lungmuang in a um thei uh a hi. Zia chu a hi zinglai in leng leh lal khenkhatte'n ho leh biak lam ah Pathian a hung kilepsan phat ua leh temple ah Pathian nasêm thiampute nasan thuzaw in Pathian hing a kiheimangsang kha sek ua, a ga i mu thei uh chu a gam leh nam uh nam dangte khut ah pûkna a hi mai hi. Zia zia chun, tu hun ah hin le namdangte simmaw leh chawtden a i umlona ding un KKP leh YVA te'n le Pathian hiatna tawh sepkhawm dan pha i nei uh a ngai a hi.

KKP leh YVA thiltup leh kingaknate leh mawpuakna apat bangchan gamla'n i um uh em?

KKP hi Kochuam huangsung ah thagaulam ah Khanglai/ khangthakte kilawi khawmna pawl min ahia; YVA hi gam leh nam huang ah khangthak/ khanglaite kilawi khawmna pawl min a hi.

KKP thupi kingakna chu **"Thilpha hi ding ah hukdam"**

Eph 2:10 ahia, KKP chun thiltup pali a nei ah, ziate chu:

1. Jesu Khrista Ginna leh Ama Batna lampi ah Khanglaite pui.
2. Kochuam khut leh keng hi ding ah khanglaite puihuai.
3. Kochuam nasep sukping.
4. Khrista Chanchinpha puanzak

KKP thupi kingakna leh thiltup palite hin Kochuam huangsung ah hin mawpuakna

HINNA VÂK

pawimaw tak a neidan kichian tak in ei mu sak hi. Lapawl zil, Chanchinpha gen, thawlawm tha kuan, KKP min ah fund raising chuam chuam bawl, khanglai chanpi kikhawm ngailote Biak In ah pui leh a dang dangte a hi. Ziate haw hi chawpkan ah, kochuam huang pawlam (*thagau lam thil ah mawpuakna khêl*) ah, a kilang melpha (*popularity*) di zawng ngaitua/ hawlina nei ah thilpha sep i hung guat phat ua leh i sep didawl gamgi khêl in pawl dang (YVA) te sep ding ah kilawm thil tamtak i va sawk kha thei ziang dia aw, ti kidawt a kûl in ka mu a hi. Tulai khang ah hin zia gamgi hi bangzat i chawpkan uh a um ta diam? Ahiloleh Khanglai puitute thagau lam dinmun in a zil taklo zia ah sunggil lam thagau siamthakna sang ah, pawlam melpha kilatna mai del kha zaw i hi thei mai diam uh ti kingaitua kham ting in ka mu a hi.

YVA thupi a hi leh chu **“Liangvaite gualpha”** ti a hi. Zia hin a huap lian ma ma ziang ah, nam sung pumpi a huap ah, Kochuam gamgi neilo ah meithai chagate sawmdawlina

lam ah, damlo hitang zia ah thisan pawimaw, accident chanpal zia ah buaina tuak, kângmei patau zia ah vangsiatna tuak leh thi leh man zia ah lusûnte zosia â ding ah gualpha ah pan hi YVA te sep leh bawl tângpi chu a hi. Zia chu hizing ngal ah, YVA chu zia sem dawk ding ah chun pawl muantâk i hi nau em ti ki-etchian thak kûl ding in ka mu a hi. Tulai khangte hin bang tiang i chiapi thei nalai diam uh aw...?

KKP leh YVA sephawmdan pha um theina ding ah puitu têldan pha.

KKP leh YVA puitu ding kitelna Dan leh mual kitup tak a kinei a hi. Zia chun vang demna di a umlo gel gel a hi. Tuni zia i gen nawp zawk chu i kitêl phat ua leh i lunggel uh khenkhat a dawu umlo a um thei diam ti ka ngaituana’n a um zaw a hi. Zia chungchang ah hin a têtute’n mawpuakna lian tak i nei uh a hi. Ginglotute’n ei têt piak uh a hi pua, ei uh Pathian hing hote ma ma’n i têt gel gel uh a hi zia in, KKP leh YVA puitu di i kitêlnau ah i lungput uh ki-enchian thak leu hin ka ti

a hi. KKP puitu di chu thagau mi deu hi di, YVA puitu di chu zu leh sa khamthei bawl thei, lêpgûk/ nêkgûk bawl thei mi hi lehle khawklo tina khat i nei uh a hi khatto em? Kuama'n chu i gendawlo uh, hilehle i lungput ua i nei zing uh a hi mai diam? Zia chu a hi khâkleh chu, ziagual lungput chu paithak a hun talaw ta a hi. Zia i pawl pani (YVA & KKP) puitu dite i têt phat ua leh taksa leh thagau lam thil ah le sit umlo mi muan um hithei leh ti a dawi um ma ma hi. A khatlam zawk zawk i nelsia khak uh a hi chun, pawl sepkhawmdan pha hung piang theilo di a hi.

KKP leh YVA sepkhawmdan pha um theina ding ah puitu dinmun pha.

Pathian thu'n *"Thim leh vak in bang hem kipawl na a nei uh?"* a ti gual in KKP leh YVA puitu Thagau lam dinmun kibanglo chu sep khawm kipawl khawm haks a di him a hi. Leng Ahab hunlai ah lengnu Jezebel khan Baal pathian a lah ho ah, Jawlnei Elijah tawh a lah kituak thei keilo a hi. Zia hunlai ah khan mipite le pawl ni ah khen thei a hui ah, baal ho

leh baal masang a khiangkho kha nailo mi 7000 (1 Le 19:18) te kha. Ahinla puitute Thagau lam dinmun a kituak taklo zia k un 7000 te ginum maleu a dang a tamzawte zia k in gam leh nam pumpi'n haksatna namenlo a tuak uh a hi. Nam puitu leh Sakhaw puitu Thagau lam dinmun a kibatlo chun mipi a chavai ah, gam leh nam â ding ah manthaina a hi. Zia zia k ah chun KKP puitu leh YVA puite sepkhawmdan pha um theina ding ah chun, a Thagau lam dinmun uh le a kibat uh a ngai hi. Khat lam zawk zawk ngainep khak chu gam leh nam khanmawbawk a hi ban ah, Pathian lunglam hilo di a hi. Thu ching khat chun, *"Mi'n Pathian a hung nei phatleh gam leh nam a ngainatdan a hung kilang masapen sek hi"* ti a hi.

KKP leh YVA sepkhawmdan pha um theina ding ah pawl min matdan pha.

Pawl pani ah puitute leh mipite'n le i mat thiam ma ma ding ua pawimaw khenkhat vak taklang leu hin, KKP min ah mithi in ah lengkhawm/ zan ha/ thân mun ah, kuan

HINNA VÂK

sang in YVA min hileh, KKP min ah nam lâm zil hilo in YVA min ah zil hileh, KKP min ah damlo zanhapi/ thisan piak/ accident chanpal tuakte buaipi sâng in YVA min in bawl hileh, chun nawpni hunte ah mo thâk leh lawp hun ah YVA lapawl ti sang in KKP min ah lapawl hizaw leh, YVA min ah missionary kuan/ semtu chawp hilo in KKP min ah hizaw leh, YVA min ah anngawl pauchapna vaiguan sang in KKP min zawk hileh. A dang le genbe di ti le hin gendi tampi um nalai di a hi. KKP min ah chun YVA min ah sep di i tite chu sep maw kei tina a hipua, ziagual ma chun YVA min ah sep di i ti deute chu KKP min ah sep theilo tina a hi diak puai. A sem dite chu a kibang (Kum 14-40) ahia, pawl min mang ah sephawm dan pha a hung um thei zawk kha i tuppen zawk a hi. KKP huang chu thagau lam gapha sua didan kizilsakna mun hi henla; YVA huang chu khawvel mitmu ah tawmngaina (*thagau lam gasuana*) sukatna mun hizaw leh pawl pani puitute chun pawl tawh kituak ah sep didawl hung khen thiam in sephawm

dan pha i hung chiapi thei zaw mai diam uh ka ti a hi.

“Kikhenna di a h’em, kilopisakna ziaak a h’em ah bangma bawlo in, mizosia’n kingaitawm tak in, ama sang ah midang phazaw’n guat chiat uh hen. Kuanma’n ama â di bep enlo in, midang a di le en zaw hen” (Php 2:3-4). Zia Pathian thu hin a zawlo puitu tamtak i um khak sek ziaak un, mani masialna leh kilopisaknate a hung zalen kha sek ah, zia phat chuleh Pathian thu tawh kituak ah i kilawikhawmnau pawl (KKP & YVA) min ah sephawmna pha a hung piang thei sek pua, pawl kihuaichuamna a hung piang ut ah, i dawilopen kikhennate a hung um khawlaw sek a hi. Mipi kibang maleh, pawl min kibanglo, leh puitu kibatlo ziaak ah kipawlkhamna pha umna di a daltu ah pan khak di hi i kiven uh pawimaw ma ma di a hi. KKP leh YVA sung ah i mawpuakna chiat un kingaitawmna tawh kikhenchuamna umlo kei ah sephawmdan pha ah semkhawm thei chiat ding in Lalpa’n i mau pui zing ta hen.

MIHING KHAWSAKDAN IN KHUA LEH VAN UMDAN A SUKDANGLAMDAN

~ *D. Lalthamuan Vaiphei*
M.A.; M. Th- II, ATC

Tulai khawvel in a buaipih leh a ngaitua ma ma khat chu khua leh van kithen danglam zung zung mai hi a hi. Zia chun mihingte leh thilsiam dangte hinkhua leh umdân a sukkhâk nasat ma ma zia in kihiatlosak thei a hi puai. Thil khawh tak chu mihingte umdan phatlo zia in khua leh van in siatlam a manaw deu deu hih a hi. Mihingte'n i nisin umdânteu kintak ah i haisanua, i simlo ua chun khawvel hi chenna tâk hung hilo di a hi. Zia chu ngaituana ah nei in zia thuzik hi i sim diu a hi.

1. Tulai Khua leh Van Umdân

'Tulai Khua leh Van Umdân' ti hin thil tamtak kawh thei in, himaleh zik senglo di i zia in thil pali (4) bep sulang di i hui.

1)Khawvel Satdan: Khawvel boruak hi a lum deu deu hi ti chu nial guallo a hi. Mithiamte chun 1850 ah kipat 2023 tiang ah khan Khawvel boruak chu 2°Fahrenheit or 1.1°Celsius ah khang zo hi'n a mudawh u'i. Kum 1982 ah kipat khan khang hat diak hi'n a gen u'i.

A number hi et mai ah chun bangma kham hi'n kilanglo maleh, boruak sat leh lum tena chun degree khat mai mai ah pung hile thil khawh ma ma a hi. Kum 1850 ah kipat khan khawvel lum dan chu kum 10 dan ah 0.11°Fahrenheit (0.06°Celsius) khangzo dan in a gen ua, kum 1982 ah kipat vang ah khan kum 10 dan ah 0.36°F (0.20°C) khangzo tina a hi (Kum 1850 lai sang ah, a le thum ah khang hat zaw tina a hi). Khawvel a lum

HINNA VÂK

deu deu zia in Arctic tuipi
leh Antartica (*vûk gam*)
ah vûktangte chu tui tha
in (tui kisuak in) khawvel
ah tuipi ah tui a tamsak
deu deu mai hi. Zia zia
chun, Maldives, Tuvalu,
Kiribati, Marshal Islands
leh gam dang dangte
chu tuipi'n a chupmang
thei ziang di dinmun in
mithiamte chun a gen u'i.
Khawvawt leh khawlum a
kitheng nasat ma ma zia
in gamsa khenkhat â ding
ah chun khawvel hi umna
tâk a hi ta pua, khâl na a
nasa deu deu a, gam kâng
(mihingte hal hi khello) le
a um mun ma ma ta a hi.
Tukum (2025) January 7
ni kipan California (USA)
gam ah meikang huaisia
ma ma kha le khawvel
a sat leh lum kitheng
danglam zia a hi. I gam in
vang zia gual thil huaisia
kha a um nai ta di pua,
himaleh khua leh van
venbitna lam ah nasa tak
ah pan i lak zello uh a hi
chun, i kiang naicha um a
hi.

**2) *Gammâng (thing leh
gua) Nasa tak ah Suksiat
ah um:*** Lei chung hi
gammang umna chu
31% (4.1 billion hectres)
ahia, himaleh mihingte'n
thil chuam chuam ah
mat ding ah thing leh
gua a suksiat nasat ma
ma zia un kum 1990 ah
kipat khan gammang 420
million hectares mang
zo hi'n mithiamte chun a
gen u'i. Tu hin chu gam
changkâng deute chun
gammâng venbit lam hi
a hung tuipi ta ma mau
hi. Himaleh i gam i et a hi
chun gammâng (thing leh
gua) venbit lam hi tasam
ma ma hi'n a lang hi. Gam
leh gua hi i nekhawlnau
ahia, i nisîn hinkhuau ah
i khawsak theina ding un
i mamawu huntawk ah
matthiam a pawimaw
hi. Mani masialna leh
chawmlo kal ah hausat
nawpna zia in gam leh
gua nasa tak in suksiat in a
um ah a khawk ma ma hi.
Tulai ah tuilet a huaisiat
deu deute, nimchim zung
zungte hi mihingte'n

gammang (thing leh gua)
i suksiat nasat ma ma
ziak uh a hi pen mai hi.
Mihingte'n gammâng i
suksiat nasat ma ma ziak
un khawvawt-khawlum a
kitheng nasa ma ma ah,
sa leh nga'n umna di helo
in a beimang zo u'i. Khua
leh van kithen ziak ah a
tuaktu chu kuama dang
a hi pua, mihingte tho i hi
kit u'i.

3) Tuithiang taksapna:

Khawvel pumpi ah tui
100 lak ah 97.5 chu chi
tui ahia, 2.5 chu mihingte
matthei ding ah tuithiang
umsun chu a hi. Tui
pawimawdan chu genlo
ah le hiatsa a hi. Tulai ah
hin tuithiang mamawna
a sang deu deu ah mi
tamtak chu a mamaw
gual tak ua tui muzolo in
a um zing u'i. Khawvel
changkanna leh mihingte
thilbawl- Industry dinte
ziak leh khawpi lian tak
tak ah mi kipunkhawm
tamnate ah hin tuithiang
mu ding haksa ma ma ta
hi'n a lang ta a hi. Khua
leh van a kitheng zung

zung ah, gammâng a neu
deu deu ziak in luituite a
tawm deu deu ua tui ah
tâksapna nasatak a tung
hi. Khawvel ah buaina
tamtak hi le tui tâksap
ziak a hi ta a hi. Etsakna
ding in: Cauvery lui ziak
ah Tamil Nadu, Karnataka
leh Kerala kibuainate;
Ravi leh Beas lui tui
kichuna ziak ah Punjab,
Haryana leh Rajasthan
government kibuainate
leh a dang dang tam tak a
um hi. I gam inle tuithiang
taksapna hi a nasa deu
deu hi. Nidang ah luitui
kumtung ah luang kang
ngailo haw le kumtung
in tui luang di a um thei
ta puai. Tu hin chu a
tawpkhawk i tung nai ta di
puau. Himaleh tu ah kipat
kum 10-20 nung leh bang
a hung suak diam vang
hiat a hi puai.

4) Boruak thiang talo: Hui
leh boruak thiangelo hi
khawvel pumpi buaina
a hi tai. Mithiamte chun
boruak a phatlo ziak ah
kumsin a hin mi 8 million
(80 lakh) vel thi hi'n a

gen u'i. World Health Organization chun gam chuam chum te'n boruak thianga a nei theina ding ua guidelines a phut ua, zia chun hui thianga lo PM2.5, PM10, Ozone, leh Nitrogen Oxide tite hi boruak ah a umdan uh zil in hui thianga leh thiangelo te na'n a mang u'i. Insung ah An huanna ah patte, mihing pung deu deu ah, changkanna tawpkhawk in a puak daw khawl chuam chuam- gari, computerte, industry ah kipat hui thiangelo leh kidak hung pawtte, lo kangte leh thil dang dange hin boruak a supawlche ua, mihingte chu a thuaktu a hi zel u'i. Boruak thiangelo zia in mihingte'n natna chi chuam chuam- asthma, bronchitis, lungchang natna, stroke, chuap cancer-te a vei khawlaw nalai set u'i.

2. Khua leh Van venbitna ding ah mimal, Khawtang leh Kochuam mawpuakna

1) Mimal Mawpuakna leh

Khawtang Mawpuakna:

Khua leh van venbitna ding ah hin thil haksa pipi bawl a ngai khel pua, i nisin thil bawl danteu siamlem leh sukdanglam a hi mai hi. Electric matlo hun ah off maite, current ne tamlo van matte, mun nai chiana keng ah chia maite, mimal gari mang sang ah public transportation matphatchuamte, nisin ah tui matthiamte, inkiang leh kimvel sukthiangte, dustbin matphatchuamte, thil buak leh nente a paina di mun ah pai tite, thingno phute leh thil dang dange a hi mai hi.

Khawtang mawpawtute'n mipite kiang ah Khua leh Van umdan venbitna lam ah ma a sawn theina ding ua zilti leh hiatsak hi a pawimaw tak zet hi. Khawtang hindan pha kiziltina ah hin Khua leh Van venbitna lam kizilti hi thupi pawimaw ma ma ahia, nutsia keilo di a hi. Sang ah upa zaw pi leh pute, nu leh pate zadan, u leh nau, insak-inthang tawh khawsak khawm didan, mi khawtua

leh hepi didan leh nisin
hinkhua ah hindan phate
bep hi khawtang hindan
pha kiziltilna'n a huap a hi
pua, i mihing chanpите bâk
ah thilsiam dangte etkawlna
leh venbit lam ah kiziltilna
pha le khawtang hindan
pha chun a huap vek a hi.
Thilsiam dang chung chang
ah khawtang mawpuakna
pawimaw ma ma chu amau
haw bei ah khawtang nun
leh kivaihawmnate'n umzia
a nei pua, amau bei ah
khawsa theilo ka hi ti kihiat
ah a phatna ding uh nasa tak
ah ngaitua leh sepdaw hi a
hi.

**2)Thilsiam dangte kiang
ah Chanchinpha gen
Kochuamte Mawpuakna:**

Kochuam hi Pathian aw
leh a matchâk pawimaw
tak mai a hi zia in khua
leh van umdan venbitna
lam a hin mawpuakna lian
tak mai a nei hi. Pathian
thu Marka 16: 15na i sim
a hi chun Jesu'n a thawkit
nung ah a nungzui sawm
leh khatte kiang in a
kilak ah khawvel zosia,
thilsiam zosia kiang ah

Chanchinpha va gen ding
ah a sawlna thu i muu.
Zia tak ah thu pawimaw
ma ma pani kimu chu:
Khawvel zosia leh thilsiam
zosia ti hih a hi.

Khawvel zosia ti hin,
Chanchinpha chu a neitu
bik umlo, mi zosia â di a
hidan genna a hi (*Nam lian
pen apat a neupen, mi lian
pen apat a neupen tiang, mi
hausu pen ah pat migenthei
pen tiang*). Himaleh
Chanchinpha chu mi zosia â
di a hi, i tia (*a neitu bik umlo
i hi zing lai un*), a neitu bik
a um theidan a um ah, zia
chu- a pawmtute chu a nei
a hi mai ua, a pawmlote chu
neitu chan chang thei diaklo
a hui.

Chun, Chanchinpha
hi thilsiam zosia â ding a
hi, ti'n i Bible in ei hil a hi.
Pathian thu i kiziltil danteu
leh i hiat danteu hi dik tawk
lona um hi'n a lang sek hi.
Chanchinpha hi Kochuam
mite â di bik ah ngaina hi a
lian talua, thilsiam dangte
tawh i kilaichinnau hi buai
sek a hi. Chanchinpha chu
mihingte â di bep a hi pua,

HINNA VÂK

thilsiam zosia â di le a hi.
Zia chu thu phuakkawm a hi
pua, i Pathian thu'n kichian
tak ah ei musak chu a hi.
Pathian hukdamna bukim
hung tung di i ngak zing uh
hi minhingte hukdamna
di bep a hi pua, thilsiam
zosia le zia hukdamna
huangsung ah chu umvek
a hui, ti hi hiatmillo di a hi.
Chanchinpha hi mihingte â
di bik ah hiatna leh thilsiam
dangte a ding ah umzia
neilo gual ah ngaituana hi
thil diklo, hiatna diklo tak
a hi. Nang leh kei â ding ah
umzia a nei chun, thilsiam
dang zosia â ding in umzia
nei talua a hi. Mihingte hi
thilsiam lak ah pakhat mai
i hui ah, thilsiam dangte
enkawl ding ah Pathian
ei guat mai i hui. Amau
chung ah thu ka nei hi ti ah
a phatna diu ngaitualo ah,
eima lawkna di a hi phawt
leh i nawp nawp ah bawl
jiang chu thil diklo a hi.

Thilsiam Thu 1:28 na
chun Pathian in Adam leh Evi
kiang in, "Chi tam tak suan
ah nei in hung pung unla, lei
chung hi lua dim unla; la thu

thu un umsak un: tuisuagiat
ah sangate, chungleng
vachate leh ganhing lei ah
bokvak zosiate chung ah thu
nei un," ti in. Zia tak ah la thu
thu un umsak un ti leh thu nei
un ti hi mithiamte'n thisiam
dangte chu a nawp dan dan
ua a bawl thei lam hilo in
etkawlna (*stewardship*) lam
kawkin a gen u'i. Enkawltuna
chu a chung ua thuneina'n a
tawp pua, a phatna ding uh
ngaitua leh thil bawlte a huap
vek hi. "Zia lei hi kumtuang
gam a ting puai," (ken le ka
pawm hi, ka nial puai) ti ah
thilsiam dangte chung ah
hiamngam tak ah tat ah a
phatna ding uh ngaitualo hi
thil dik a hi na diam? Thl 2:
15na kha i sim leh hiti hin a
kigen ah, "Lalpa Pathian in
a pawsal siam chu a pui ah,
Eden huan kaitua ding leh
veng ding in a koi tai." ti i mu
a hi. Zia thu hin ei kawkmunawpchu: Pathian in mihingte
chu thilsiam dangte kaitua di
leh veng ding ah guat i hidan
uh a kilang chian ma ma hi.
Pathian in amau enkawl ah,
kaitua ah, veng ding ah ei
guatna chu hethaimlo ah i

sepdawlo zia k ua, tuni hin mihingte'n i lethawk uh a hi tai. Khawvawt-khawlum kitheng danglam nasa talua ta te, tui thiang nek di haksa deu deu tate, gua a zuk deu leh tui let gei gui ziangte hi thilsiam dangte etkawldan i thiamlo zia k vek uh a hi tai. Mihingte hi thilsiam dangte bei ah hin umzia neilo i hui ah, zia chu la ngaitua/ i ngaituau khau em? Kumtuang gam di bep ngaituana zia k ah thilsiam dangte chung ah i mawpuaknau hi ngaisaklo ah um thei di i hui em? Kochuamte'n kumtuang gam i ngainatnau chun thilsiam dangte khawtuana leh lainatna ei neisak di hi zawlo a h'em? Kochuamte mawpuakna chu thilsiam zosia kiang ah Chanchinpha gen ahia, zia chun mihingte bep a tup pua, thilsiam dang zosia le a huap vek hi. Amau bei ah khawsa theilo, amau mamaw zawte i hi zia k un khua leh van umdante venbit a hi ah siamphat a hi theina ding in Kochuam leh a mite'n mawpuakna liantak a nei u'i. Amau phatna di ngaituana

chun khua leh van umdante siamphat thei hi'ntin, khua leh van umdante siamphatna chu mihingte â ding ah damna, muanna leh bitna a hi.

Thutawp: Mihingte hinkhua leh lum leh vawt phatna ding ah hin mawpuakna liantak i nei ua, zia chu i makmaw uh a hi. Thilsiam dangte hi mihingte bei in a um thei ua, mihingte vang thilsiam dangte bei in i khawsa thei puau. Pathian in thilsiam dangte enkawl ding ah ei guatna hi ngaitua thak a kul in a pawimaw takzet a hi. Thilsiam dangte phatna di ngaipawimaw lona hi Pathian thilsiam chung ah helna ahia, thil khawk ma ma a hi. Nisîn kochuam leh khawtang hinkhua ah hindan pha kiziltinla hinkhua leh van venbitna lam ah kiziltinla le a huap vek ding a hi. Thilsiam dangte ngaisak lona hi Pathian thilsiam leh a guanggalna zalona ahia, zia chu kuama dang a ding ah thil pawi a hi pua, mihingte â ding ah thil pawi tak a hi zia k in Kochuam leh Khawtang ah pan nasa tak ah lak a kul ma ma ta a hi.

HUKDAM HI KIHETCHIANNA

~ Tv. Henlallian
B.A.; B.D.

***Jesu'n a kiang in, Keima hi lampi leh thutak leh hinna ka
hi. Keima ah chia lo chu kuama Pa kiang a tung ngai puau
hi. (Johan 14:6)***

Gingtute lak ah thu pawimaw leh kigen tam pawl chu Hukdamna thu a hi di ginchak a um hi. Reform Theology minthang tak pakhat R. A. Finlayson chun, "*Hukdamna/ Hukdam hikihiatna theology hi Khristiante chanchin ah kinialna um zingna thupi a hi*" a ti. Zia thu hi tu tiang in le a dik zing nalai a; kinial hichetlo lehle, pawmdan kibanglo chu a hizing nalai hi.

Kochuam mite lak inle zia thu hin a sukbuai zing, ginlana zia ah mani kigingzolo-te, puk leh din thua ah hukdamna lampi thamuanglo tak a zawt ah hinkhua mang tampi i um ding uh le ginchak a um hi. "*Gawtmun chia kha'ngka*" ti ah kigingla pawl, "*Hukdam hi'ngka*" ti ah kihetna neilote chu hukdamna huang ah dawl saklo pawl; Gintu taphawt chun hukdam hi kihiatna a nei ngei ngei di a hi ti pawl; Hukdamna hi hina/ mawpuakna zia ah têt

pawl; Pianthak kit zetlo chun hukdamna ting ah ngailo pawl leh a dang dang. Zia i taklatteu ah pat hin, '*Hukdam hi kihiatna*' hi hukdamna sang ah kaw pawimaw zaw a umthei tina a hi. Hukdamna hi ei uh lam ah pat ah te ah te chi a hi diam? Hukdamna thu hi banggual in i la tangkopi sek uh em?

Hukdam hi kihiatna chi ni:

Zil mite chun, thilhi thuaktu chu 'object' ahi'n, a thilhitu chu 'subject' a hi tiin a gen sek u'i. Etsakna'n 'Bawng

kamu'i. A mutu kei chu subject kahia, ka thilmu bawng chu object tina a hi. I thil hiatdan genchianna ding in object lam ah pat genchian dan a um ah, subject lam ah pat genchiandan le a um bawk hi. Thil i hiat him him uh hi a hetu (subject) zil in a danglam thei hi. Hukdamna chungchang ah hinle a changtu mizia, a chandan leh a hiat thiam dante i kawisan takluat chun midangte hiat thiamlo leh ei kikawppi theilona tamtak a um thei sek hi.

Etsakna'n, Lamka lam zuan in la chia, la nung lam ah pat hui hat tak in a hun mût a, nang chun, 'Hui ei mut zia in ka lam zawt le a bailam chuam mamai' la tia. Ahinla, Lamka lam ah pat kile pa chun, 'Hui in ei lê-mut zia in, lam zawt le a haksai' a ti di ginchak a um hi. A hui tuak uh chu a danglam pua, hui nundan leh a ngatna lam kikhêllo maleh, a dawngtu lam chu a danglam zaw a hi. A chungah mi pani te'n a gen uh chu a dik gel gel hi, ahinla amau â di bep ah dik chu a gen uh a hi.

Zia zia chun, thil a hina diktak gen di i hui chun danglam theilo a hina diktak eima lam ki-en masalo ah, a diktak pen kha gen di a hi. Hukdamna le zia gual chu i gen didan tak uh chu a hi. Danglam ngailo Pathian leh a nasep chu i thîl masak uh a ngai a, Pathian thianthona ma ah eima ki-etchian hin, i hinau tak tak a kilang chian sek a, i hinau tak tak hetchianna ding in i ki-etnau limlang (*mirror*) chu Pathian thu a hi di a hi.

Ahinla, i thil hiat leh a hetu chu khen tak tak thei a hi puai. Hetu umlo in thil hiat di khan umzia a nei pua; hiat di thil umlo hileh, a hetu a ding in hiatna chu a panna bei gual a hi. Hiat di thil umlo hileh hiatna hi um pua'ntin, hetu umlo hileh, hiatna chu a umlo disa a hi. Zia zia chun, hiatna i tiu hin a hetu leh a thil hiat kilaichindan ah pat a genchian gel gel sek hi. 'Hukdam hi kihiatna' i tiu hile a hetu mihing dinmun (*subjective*) lam ah pat leh Pathian leh a thu (*objective*) lam ah pat miten genchian a la guat sek zia u a ngaidan kibanglo a um

HINNA VÂK

khawlaw sek a hi.

Thil him him chu a hetu in a hiatdan leh a thiltuakte ah pat bep hilchian a guat chun, a ngaidan leh a experience te belap intin, ama â ding ah chun a dik le a hithei hi; ahinla midang â ding ah a la mat tâk khello thei hi. Ziagual deu dan a chun, hiatna dik chu, i thil hiat di thil (a hina) diktak ah pat hilchian ziang di ahia, ngaidan belap a lem puai, zia hi Bible hilchianna ding ah pawimaw ma ma chu a hi.

Eima lam kihiatdan ah hin sang ah Pathian lam en zing kawm ah hin hi kipakna, gâpha a sua zawi. Eima lam bep i ki-et sek ziaak ua Pathian lam le en manlo i hi diam uh aw! Kuale ama lam bep ngaitua ah ki-ente chun, mihing a mulian sek ua, zia chun midang tawh kitena lungthim a piansak sek a, zia chun mi a chapo sak a hilo ngal leh a kikawi niam talua sek u'i. I lasak teu hile vak en leuhin, Pathian etna lam Lâ sang ah eima lam kiêtna/ kihepina lam Lâ i tuipi zaw mama tau a bang hi. Mihing hina

kawisan (*a laimu ah pansak*) hi Evangelical Khristian-te gindan a hina tiang a um hi. Ahinla, i bangkim nâk uh chu Pathian a hi ti ginthiamna hi Presbyterian kulmut takte gindan a hi.

Lampi la chia lai ah nangma bep ki-en tale chun, lampi haw dik thei pua'nla; ahinla, la et tam zawk chu lampi a hi chun, haw dik thei bep inla. Jesu'n Johan 14:6 ah "*Kei hi lampi leh thutak leh hinna ka hi, keima ah chia lo chu kuama Pa kiang a tung ngai puau hi*" a ti. Chun, Hebrai ziktu'n le Hebrai 12:2 ah, "*I ginnau siampa leh subukimpa lam chu en zing hitiu*" tiin gingtute i chia didan uh ei kawkmu hi. Lampi diktak, Jesu chu i et uh a ngai a, lampi chia zel di i hui chun eima ki-en man di i hi puau a, Jesu chu i et di diktak uh a hi. Jesu lam enzingte chun amau bitna a muchian un, amau a kihiatnau le a chian zaw sek hi. Pathian gin-umna kinga ah, thamuang tak a chia dite chun i et di Pathian chu i hiatchian uh a pawimaw pen a hi. Hukdam hi kihiatna lampi ah hinle et di diktak

Jesu et a pawimaw pen a hi.

M. Polanyi chun eima kihiatchianna chu zia gual hin a hilchian hi; thîkkil chu thingpek ah khetbûk mang in killut la gua; La khut veilam in thîkkil chu la tu, la khut changlam in khetbûk chu hûm in la khên ah. Khetbûk chu la en ta puai, la khet di thîkkil leh thingpêk la kilna di mun kha la en zaw a hi. La mit leh hiatna chun la kilna di mun chu la lungthim zosia'n la pia, zia chun la thil hûm khetbûk chu a thunun a, "ka khut changlam tawh a kizawn na em? a khenkha na diam?" ti ah khut changlam kha en sese lo in la khen ngat ngat thei a hi. Zia chu a hi thilhi thuaktu (Object) leh a hitu (Subject) kilaichinna leh thilhi in a hitu a thunun dan!

Ziagual a chun, Pathian lamah i lungthim zosia i piak a hi chun, eima tiang ei kihetmil sak sek a; Pathian i hiatna zawk chun eimau chu lampi diklo lak ah manglo ding in ei pui ah, lampi dik haw ding in ei la thunun zawsek a hi. Eimau i kihiatchiannau hi

eimau ah pat pawt a hipua, ei hechiantu Pathian ah pat pawt a hizawi. Hukdam hi kihiatna hile Pathian ah pat i dinmun i ki-etchian zelna ding ua pawimaw ma ma chu a hi.

Gari ah lungmuang tak ah i chut ua hin, gari siamtu leh a siamdan chipchial tak in i hiatpi khel khel puau a, khawi ah bang gual ah hung kipan a h'em ti le i he puau; ahinla thamuang tak in i chu mai sek u'i. Gari umdan, a phatchuamdan, a nasep theidan i hiau a, zia ziak chun ging ngam in lungmuang tak in i chu mai sek u'i. Pathian hile, bangti hung um a h'em? Bang gual ah hung um a h'em ti helo leu hinle, a thilsiamte, a thilbawl lopitakte ah pat a kipuandan i mu ua, i ging ngam ua; a kiang i zuan mai sek uh a hi. Hukdam hi kihiatna hile ama Pathian, ei hukdamtu hiatna ah kinga a hi. Zia chun eimau kihiatna chu a thunun a, ama ah i bit ziau leh chawldam a um zia i hiat khawlaw sek uh a hi.

Thukhakna: Jesu Khrista bep hi Hukdam hi kihiatna ah i

HINNA VÂK

kingaknau chu a hi. Hukdam hi kihiatna ah kingakna chu eima lam ah pat hawl i hiu chun thilpha hiziak leh mani felna lam ah pat hukdamna hawl tina hidi i hiu. Zia zia chun, Calvin leh Reformers dangte khan Hukdam hi kihiatna hi Jesu Khrista nasep a hi thu leh Jesu kihiatricsakna zia bep ah ginumna hethei i hiu a, a gin-umzia i hiat zia bep ua Ama gingthei bep i hiu ti chu a tângkopidan uh a hi.

Ginna kiti hi mihing ngaidan bep ah kinga a hi pua, mihing thepzaw ah a um zia ah hung um le a hi diak puai. Muan ngam/ kingakna tâk hi ah i hiatteu chung bep in i lungthim uh i phawldawk sek uh a hi. Ziagual ma chun, ginna hung umtheina hile Pathian

nasep, Pathian thilthawnpiak a hi. A bul pantu le Pathian tho a hi. Pathian kipuanna dawng ah, muchian tak tak te chun, a thil mu-uh leh a thil hiat uh chun kilepsanlo ding in a hinkhua'û a pui a; zia chun, Pathian thu a zawp sak ah, a ginnau a hihat piak a (Lk 17:5), hat zawmzêl di a hiu.

Ginna lam ah lampi diktak haw di chun, i zawt di lampi'û chu i chian uh a ngai hi. Mitthûm chun a tiangkhut mangcha lampi a chian zet masang in lam a zawt ziang thei puai. Sawlchâk Paul in, “Ka ginna ka ngaknapa chu ka hia’i” a ti gual a hin, i ginnau kingakna i hiatchian uh chun zia chu Hukdam hi ki hiatna dik leh bulpatna dik pen chu a hi.

USA President Abraham Lincoln kha a lawi kinaipi tak khat chun, “La melmate hi lawipha ah siam di la guat a h’em? La lawi hilo, la melma a hui. Sukmangthai la guat zawk di a hi,” ti in a melmate chung ah nunnem a sak takluat zia in a hil ah. Lincoln chun, “Lawi ah ka siam chun ka melma chu ka sukamangthai zawk hilo di a h’em,” ti’n zaidam tak in a dawnhu hi.

~ Anonymous

HE NU EI DAWT PIAK IN,
HE PA PAUCHAP INLA

~ *Upa Khuplal*
Pillangkata

“He Nu ei dawt piak in, He Pa pauchap inla” ti la hi i gam ah halthakna a tunlai ah, Lengluang ah ka umlai ah kala phuak a hi. Zia lai ah chun i gam uh hi Khristian Sungkuan vek a kihi tângpi’n, i gamsung ua halthakna tunlaitak a la hi bawk hi. Thingtang gam ah halthakna tun ziak in, lobûk ah kichawl lai inle Pathian thu a kigen sek ah, zau lampi chialai inle Lâ sa kawm in Inlam, lo lam kichia lai inle, a la nuam thei ma ma hi. Zia hunlai a chun, Rev. C.V John, Dr. Th. Lamboi, Rev. Kh. Khaizakham, Rev T. Zuanlal leh Rev. Kapa te’n le Lengluang a hung taw ua, Homeguard te’n le Missionary châwm ding in a la guanggal lai tak uh a la hi. WCO lawi upate leh khanglai lawi upate’n le Kailam nuai lam a hung ve tha zing sek u’i.

Zia hunlai a chun thingtâng ah mi zosia’n sîn ah lo tho ah a umlai unle nitak Biak In kikhawp di kâl ngakla ma ma kawm in Inlam a kizuan sek ah. Khawsung ah kiholimna tângpi chu Pathian thu a la hi mai hi. Zia lai a chun Kailamnuai District ah YCO President ka tûk laitak a la hi’n; Intin ka la taw sek a. Zia chun insung khawsak dante ka ngaitua sek hi. Kei uh insung le mâwl tak ah khawsa ka la hui a, nu le pa’n cha leh nau kitûp tak ah a etkawlo chun bangti gual ah Khristian inkuan chu khangto thei di a h’em ti ka la ngaitua vung vung sek hi.

Thingtâng ah Nu leh pa lekha helo in naupang a etkawl uh hi bang ti’n khangto di a h’em, ti chun maban chu thimtak gual in a la kilang hi. Nu le pa’n chate taksa leh thagau ah a etkawl hawilo chun i gam uh hi sia ma ma ding a hi ti’n ka mu’n. Zia lai a chun Lengluang khawgei a tâng nuam tak mai a um in, zia chu School-In-tang ka la tiu a. Zia mun a chun Kochuam programme a la kimang sek ah, chun nitâk sîn leh zia tâng a chun pauchapna hun ka la mang sek a hi. Zia tâng ahin a hi zia La hi Pathian in ei la pia. i.

HINNA VÂK

Zia lai a chun nu leh pa pangkhâwm ah cha leh nau Pathian thu tawh kituak ah naupang etkawl a hilo chun bangtin Khristian inkuan khangto thei ding a h'em ti ka la muchian in, zingkal ma tak ah lo kikuan in, hun tamzaw chu lo nasepna'n a la kimangchai sek a hi. Hun hi a chia zung zung mai a, Pathian thu tawh kituak ah hun mat di a hi ti lungthim in a la kilang a hi. Kum a hung kidang zel ah, Lalpa â ding ah hun i mat diklo chun, hun hi liam zung zung mai ziang ding a hidan leh thil phalo hung tung mai ding a hidan ei ngaitua dawsak a hi. Zia ziaak chun, nu leh pa'n naupang chu kilungtuak tak ah, Pathian heding ah i kietkaw! ding uh a hi. Zia chu vei ma ma in ka lungthim ah Pathian in zia La hi ei la pia, ka la dawng a hi.

Tulai ah cha leh naute haw hi lekha a thiam thei ma mau tau a, pil le a pil thei ma mau hi. Himaleh, Pathian thu ngaisakna leh hiatna chungchang ah hin nu leh pa te'n i la ngaisak tak taklo ziaak un a lunggil tak un Pathian launa hi a nei tawm ma mau

ah, etkawl le a hung haksa deu deu hi. Pathian kiang ah pauchap mailo chun eimau hâtna zaw di gual hilo a hi. I chateu hi taksa leh thagau ah a khanto theina ding un Pathian laudan ziltîl hitiu in, kikhawp ngai pawimaw didan ziltîl/ kawkmui hitiu in, taksa leh thagau ah mi mantam a hung hitheina ding un, guntak leh taima tak in Pathian kiang in dawn in pauchap piak zel hitiu. Hun hi tûktân guallo ah chia zing ahia, hetlo kâl ah i chate haw hi ziltîl/ hilding ah a la kikhêl mai ziang thei a hi. Lungthim leh titakzet ah i cha leh naute â ding in pan lathak hitiu. He Nu, He Pa en un naute haw hi en un, sualna lampi'n a chia, tho zaw di gual ei ta puau; dawt piak hitiu in, pauchap piak hitiu, Pathian kiang in tut zel hitiu.

Zia La thu hi mangcha'n nu leh pate zosia'n i cha leh naute â ding ah Pathian kiang a tut in pangthak ding in Pathian in i chung un hatna leh damna'n ei jangvuk zing ta hen.

“He Nu ei dawt piak in, He Pa pauchap inla” ti La hi Pathian in malzawl zel taken a ma lopina ding in.



**Ni 21 June, 2025 (Kiginni) in CKNP Bialfan Programme
Sumtukphai Pastor Bial ah nei a hi.
A mun: Sumtukphai Kochuam Biak In**



MUNPI PASTOR BIAL KNP SEMINAR MATNA

Achiasa Ni 24 June, 2025 ni khan Munpi Pastor Bial in Thingkeu Kochuam Biak In ah Pathian mapui nazal in seminar a la mangthei u'i.

Seminar latute:

1. Upa Khawlkap, Bial Chairman
Thupi: Khristian Hindan Kilawm
2. T. Upa N. Muanthang
Thupi: Pauchap Pawimawdan
3. Upa Lalsang
Thupi: Kochuam Numei Pawl(KNP) Kikaihuaina Dan

2025 Pastoral Ministry Thupi
CHAMNA SIAMTU
(Mat 5:9)

~ Rev. Vanlalchhuanga
Moderator
Tangphai Provisional Synod

Khawvel ah hinkhua sunuamtu chu thamuanna tawh kituak tak ah umkhawm hi a hi. Hausakna chun thil thupi tak a bawl thei ah, maleh lunggil ah limna a pe thei pua'i. Chamna chun haksatna kâl ah le sunggil lam ah chawldamna a pe thei hi. Khawvel in chamna pawimawzia a het ziak in tuni tiang ah hin lemna leh muanna hawl in theitawp a sua zing hi. Lal Jesu'n le a ngâi pawimaw ma ma hi. Chamna siamtute chu Pathian cha ah sak hi di a hui a ti hial hi.

Chamna chu bang a hi em?

Chamna chu kithugual tak ah umkhawm hi a hi. Chanchinpha Matthai zik ah Lal Jesu'n a thugenna ah chamna genna ding ah a thumal mat, Greek-te leh Hebraite'n a gen sekdan ua kipat hin sau tak chu ei hilchian thei ngei ina. Buaina leh haksatna lak ah kipat bitna bep a kaw k pua, thilpha chitin chên zing kawm ah limna lam a kaw zaw a hi.

Lal Jesu chun 'Chamna dawite' ti a h'em in a gen pua, 'Chamna siamte' a ti khel khel hi. A sep ah sep thaw, tha leh zung sêng ah pan late a hi a thugen in a kaw tak chu. Haksatna ahiloleh thawkna di a um khâk lehle zo ding ah hangsan tak ah phutheng ngam, phalo ah kipat pha a hung um theina ding ah pangte a hui a gen hih. Dikna pholang ah, diklona paitha ngam le a kaw ngal hi. Chamna i hiatthiamdan uh tawh a kituak na diam?

Chamna Palai Khristiante

Kochuamte hi Lal Jesu taksa, Pathian hing chate i hui. Pa Pathian in i damna ding ua a hung piak a Chapa Jesu Khrista nungzuite hin i Lalpau chu Kilemna Pathian a hi gual ngei in, ei unle chamna chu i hinpi diu a hi.

Tulai ah i khawvel uh dinmun diak diak ah hin chamna palai hi ding hih a pawimaw ma ma ziang hi. Nam leh nam i kido ua, khawtang ah kithutuakna a um tak tak thei pua, nam khat sung ziang ah le kithutuakna di lam sang in kituaklona di, kigensiatna di i hethei zaw sek u'i. Lalpa ah kipat hepina longal ah chun kichamna leh lunggil tak ah kipat chamna thu gen chu a haksa khawpmai hi. Himaleh, i sep di tak uh a hi ngal ah; Pathian chate i hiu chun i bawl ngei ding ua thupiak a hi.

Pathian thu chun, '...a thei lai sia nangmau chung ah kinga a hi chun, mi zosia tawh kicham in um un' ti in ei hil hi. Eimau lam zawk kisiamlem ah, kisuktup masak zawk di a hi. I lungthimteu leh sunggil ah i ngaituanateu humbitna (selgukna) ding ah bâng sang takte hi i suksiat phawt uh a ngâi hi. Eimau hinkhua ah thil lopi tak i bawl thei uh pakhat chu midangte tawh kituak tak ah umkhawm ah, midangte tawh i kikâl ua lei dawmattu, Jesu Khrista batna hindawpi hi a hi. Lal Jesu chu lei leh van kikâl ah kichamna palai hi ding in Pathian in a hung sawl ah, chamna siamtu, kichamna ding ah semtu lopipen a hi.

Chamna chun kipumkhatna a siam

Kithutuaklo in mi pani'n kal a suankhawm thei puau ti Pathian thu'n ei hil hi. Pathian tawh i kituak (kilem) phawtlo ua leh midang tawh kituak chu a haksa sek ah, ei leh ei ziang le a kibuai ziang thei sek hi. Zia zia chun, Pathian tawh kituak (kicham) phawt a ngâi ah, zia chun kipumkhatna hung um thei intin, chamna hung um thei ina.

Sawlchak Paul zilsakna lâigil pen chu kipumkhatna a hi. Taksa lam ah kipumkhatna ding in thagau ah kizawpmat, kipumkhat phawt a ngâi sek hi. Zia chu a hung um theina ding in eima kihetmil ah, kipiakhâk a ngâi sek hi. I thil bawl taphawt uh chu Pathian lopina di hi zing henla! Lalpa chu pakhat a hi gual ngei in i tup uh leh i thilhiteu chu hung kituak ta hen. Sual umlona chu a zalen ah, kipumkhatna a hung um ah, a muanum sek hi. *Chamna siamte chu mi hampha a hiu; Pathian cha ah sak in um di a hi ngal un.* Pathian chate i hiu ah, lemna leh muanna a um theina ding in pan la zing hitiu in, Lalpa ah chun kipumkhat zing hitiu. Kilunggual tak leh kizawpmatna dik tak tawh midangte kithugualpi (kichampi) hitiu.